

31 JAN 2001

Mahathir-Globalisasi

GLOBALISASI HARUS BERI MANFAAT KEPADA MANUSIA, KATA MAHATHIR

KUALA LUMPUR, 31 Jan (Bernama) -- Datuk Seri Dr Mahathir Mohamad berkata globalisasi harus memberi manfaat kepada manusia dan bukan sebaliknya.

Perdana Menteri menekankan tentang perlunya globalisasi diawasi dan dirancang dengan teliti supaya ia memanfaatkan semua manusia dari setiap pelusuk dunia.

"Globalisasi harus dirancang dan dirancang dengan teliti.

Perancangannya harus membabitkan semua orang dari setiap pelusuk dunia.

"Ia harus membawa kebaikan kepada setiap orang dan ia harus terbukti memberi manfaat kepada semua. Ia harus dilaksanakan dengan perlahan dengan usaha terbesar tertumpu kepada kawasan-kawasan yang kurang membangun di dunia," kata beliau ketika merasmikan "Perundingan Antarabangsa mengenai Globalisasi" di Hotel JW Marriott di sini malam ini.

Dr Mahathir juga menegaskan tentang perlunya mengekalkan prinsip-prinsip pasaran seperti perolehan keuntungan tetapi pencatutan, mengeksploitasi golongan miskin dan penipuan oleh golongan kaya dan pintar harus dihukum oleh masyarakat antarabangsa.

Dr Mahathir berkata harus ada pergerakan bebas modal dan buruh tetapi tidak sehingga menjejaskan negara-negara terbabit dan pada masa yang sama, produktiviti dunia harus ditingkatkan dan ketidaksamaan dalam semua bentuk harus diminimumkan.

Dr Mahathir mencadangkan pengaliran bebas modal manusia dibenarkan di bawah globalisasi dengan negara-negara yang mempunyai lebih pekerja harus dibenar mengeksportnya ke negara-negara yang mengalami kekurangan tenaga pekerja dan menghadapi kos buruh yang tinggi.

"Produktiviti dunia sudah tentu akan bertambah baik. Dan ini memang baik untuk globalisasi," kata beliau.

"Saya berpendapat kita tidak mungkin dapat melakukan semua ini semasa seumur hidup kita atau dua seumur hidup. Tetapi kita harus bermula dan kita harus bermula dengan memikirkan tentangnya, memikirkan tentang globalisasi seperti perkongsian kekayaan dunia dalam konteks bahan mentah, modal, buruh, dan teknologi.

"Inilah globalisasi yang memberi manfaat kepada manusia. Globalisasi harus memberi kebaikan kepada kita dan bukan kita manusia memenuhi kehendak globalisasi," kata Dr Mahathir.

Globalisation harus membabitkan seluruh dunia tetapi apabila orang bercakap mengenai globalisasi, mereka cuma memikirkan hanya negara-negara yang mempunyai pasaran yang telah maju atau pasaran sedang membangun.

Dr Mahathir berkata: "Kita memikirkan untuk membuka pasaran sekarang. Kita memikirkan untuk memaksimumkan keuntungan kita. Tetapi kita tidak benar-benar memikirkan mengenai dunia, mengenai dunia yang meliputi kawasan-kawasan biasa dan tidak biasa serta tidak boleh dimasuki."

Beliau menarik perhatian tentang perlunya bagi masa memberi kesan kepada perubahan yang diperlukan oleh globalisasi kerana perubahan menyahstabilkan dan perubahan pesat ialah yang paling menyahstabilkan, kata beliau.

Beliau berkata: "Mereka yang sudah bersedia, mereka yang kaya harus berubah dahulu. yang lain boleh menyusul mengikut kemampuan mereka, mempelajari daripada mereka yang telah berubah sebelumnya, menyesuaikan dan memperkukuhkan."

Dr Mahathir juga berkata dunia sekarang amat kaya kerana kombinasi

sumber asli dan teknologi yang telah dimajukan oleh manusia, dan tiada sebab dalam "dunia yang penyayang" ini ada orang harus miskin.

Afrika, Asia Tengah, Amerika Selatan dan Pasifik Selatan dengan mudah boleh menjadi kaya dengan melabur lebih modal dalam usaha pembangunan dan produktiviti, kata beliau.

Beliau berkata: "Jika dunia hendak bersifat global, maka tidak harus ada kemiskinan di sesetengah kawasan dan kekayaan yang keterlaluan di kawasan lain. Semuanya harus berjalan baik. Modal bersama teknologi moden mempunyai keupayaan untuk memperkayakan seluruh dunia.

"Kita boleh melabur dalam sistem kereta api untuk membawa bahan mentah dan import Asia Tengah pada kos yang rendah. Kita boleh membangunkan sungai-sungai ternama di Amerika Latin, Afrika dan Asia menjadi saluran pengangkutan seperti sungai Rhine dan Danube di Eropah," kata Dr Mahathir.

Beliau juga berkata manusia boleh melakukan banyak perkara bagi memenuhi maksud sebenar globalisasi seperti mengangkut air bersih dari salji yang cair ke kawasan padang pasir yang kering di dunia seperti juga minyak dan gas disalurkan melalui paip meliputi beribu-ribu batu.

-- BERNAMA

AFY MK AHH FAZ